

Regional News Unit AIR Aizawl
Tuesday, April 08, 2025
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chhim lam tlawha thang mek PWD Minister Pu Vanlalhlana nizan khan Siaha a tlawh a, vawiinah Lawngtlai a tlawh ang.
- Lunglei West bialtu MLA Pu T. Lalhlimpaia'n ATL Road an siam dawnlo anih chuan MLA atanga chawlh a hrehlo tih a sawi.
- President Droupadi Murmu leh Portuguese President Marcelo Rebelo de Sousa te chu nizan khan Lisbon ah an inkawm.
- Union Home Minister Amit Shah-a chuan ramri vil turin khawl changkang electronic surveillance system hman anih thu a sawi.

<><><>

PWD MINISTER

PWD Minister Pu Vanlalhlana chuan nizan khan Siaha lutin District chhunga official thenkhat ten circuit house-ah an lo hmuak.

Pu Vanlalhlana hi Siaha District chhunga kawng sial hna thawh mek leh kawngpui dinhmun ena zin a ni a, Pu Vanlalhlana chuan rei an cham thei lo pawl a ti a, District chhunga kawng dinhmun fiah fai zawka en turin zin leh ngei a tum tih a sawi. PWD chu Department pawimawh tak a ni a, Kawng siam bakah Building sak te, Lei dawh te leh project lian tak tak thawk thin an nih avangin fimkhur tak leh ram hmangaihna tak tak nena thawh a pawimawh a ti. Kawngpui siam ringawt a tawh lova, intlawhpawhna tha a awm theih nan tha taka enkawl zui a tul a, departmenta thawkte pawh tan lak a ngai nasa leh zual tiin theihtawp chhuah theuh turin thawktute a fuih bawh a ni.

Pu Vanlalhlana hian vawiin hian Lawngtlai a tlawh leh nghal ang.

<><><>

ATL ROAD ISSUE

Lunglei West bialtu MLA Pu T. Lalhlimpaia'n Aizawl atanga Lunglei panna kawng ATL Road siam chu an mawhpawhna anih angin an siam dawnlo anih chuan MLA atanga chawlh a hrehlo tih a sawi.

He thu hi nimina ZPM Southern Hqtrs. Lungleia chhung inkhawmah sawiin Pu T. Lalhlimpaia chuan Thenzawl kaltlanga Aizawl leh Lunglei inkar kawng siam chu a bilha tho lo anih avangin ruahmanna mumal tak a awm a ngai tih sawiin theihtawpin Lunglei kawng a that theih nan hma an la a ti a, Lunglei mipuite mangang lo tura chahin Lunglei kawng siamthatna tura sum ruahman cheng vbch 90 leh nuai 69 chu Lunglei division pawisa vek anih loh avangin Aizawl khawchhung kawng siam that nan cheng vbch 44 leh nuai 80 dah ani a ti a, ATL Kawng siam chhunzawm zelna tur chu sawrkarin a ngaihtuah dawn a ni a ti.

Lunglei West MLA chuan Hmuifang Division-a pawisa tang pung awm chu, Lunglei divisionah hman a nih theih nan hotute hnena an thlen thu sawiin he kawng hi haw haw chiam a, innawr a, a hunlaia Lunglei mipui demand a sosan avanga siam anih thin avangin hmanhmawh taka siam ani zelin a lang a, chuvangin tun tuma kawng siam turah hian Lunglei mipui te tuarchhel in, hna thawk thei turin hmun kian se a duh tih a sawi a ni.

ATL Road repair work hi Firm leh Company engemaw zatin an thawk tawh a, he kawng hnathawktu hrang hrang te a kawm tih MLA chuan sawiin, ATL Road contract hnathawh hi hrehawm an ti tlang hle a, chuvangin contractor pawh hi tlawmngaia lo in ngen te pawh an nei nawk tawh thin a ni awm a ni a ti

Aizawl atanga Lunglei panna kawng siamna tur sum pawhpen chungchangah hian tun thla ni 4 khan MZP Lunglei chuan thuchhuah siamin a hmanna tur dik taka sum hman anih theih nan sawrkar an ngen thu an sawi a, nimina an thutkhawm lehna ah ATL road siamna tur sum pawh pen duhloh lantir nan Nilaini-ah Mizofed kawt Venglai-ah chhuahkhawm nise an ti a ni.

April ni 5 khan Lunglei Thalai Pawl chuan ATL Road chungchanga PWD Minister Pu Vanlalhlana thusawiah an lungawiloh avang leh Lunglei kawng tha an nghahhlelh laia sum pawh pen ani chu an lungawiloh thu an sawi a,

PWD Minister Pu Vanlalhlana chu a mualpho nasat hmaa inhnukdawktura an duh thu sawiin kawng chungchangah an beisei a phalo hle an ti bawk.

Chhim lam tlang dung fanga thang mek PWD Minister Pu Vanlalhlana chuan nimin khan Sangau leh a chhehvel khuate tlawhin hmasawnna tur hrang hrang a sawipui a, Pu Vanlalhlana hian MZP Lunglei in lungawilohna lantir an tum ni naktuk chawhnu dar 2 ah Lunglei Press Club ah Press Conference a ko a ni.

<><><>

ZPM

MLA Pu Lalmuanpuia Punte chuan raltlante chungchangah ngaihtuahna sen angai a, eizawnna an mamawh vea ruahmanna fel tak nena enkawl an ngai a ti.

Nimina ZPM Party chhung inkhawm Aizawl-a ZPM Gen Hqr office a neihah thusawiin Pu Lalmuanpuia chuan raltlante chu mihringpuite an nih bakah Zohnahthlak unaute an ni a, thil duhawmlo a thlen apianga raltlante mawhpuh thin pawh a dik vek lo thei a, YMA ten theih tawpa hma an lakna a chhuanawm hle a ni a ti.

Adviser to Chief Minister (Political) Pu Lalmuanpuia Punte chuan mahni mihringpuite nen khawsak ho thiam a pawimawh a ti a, thih hnu piaah lam a pawimawh ang bawkin khawvela mihringpuite nen khawsak ho thiam a pawimawh hle a, politics a Pathian ram tundin a nih theih nan mahni mihringpuite hmangaih kawnga tan lak hi a tul hle a ni, a ti.

<><><>

LENGPUI BRIDGE

Aizawl atanga Lengpui Airport panna kawng Sihhmui kaia Tlawng Lei dawh that hna thawh mek chu nimin khan a thir ruangam dawh kai a ni.

Tlawng lei ruangam hi nimin khan dawh niin a tahtawlin nawr pheii a ni a, chawhnu dar 1 rik hma deuh khan tluang taka dawh zawh a ni.

Lengpui Airport kalkawnga lei dawh chungchangah hian Aizawl SP chuan thuchhuahin April ni 6 leh ni 8 inkarah lirthei eng chi mah kal tlang phal a ni dawnlo a ti a, Lengpui Airport leh Mamit lama kal tur ten Buichali lama kal a ngai dawn tih sawiin thupek chu mipuite zawm turin a ngen tih a sawi bawk.

Aizawl atanga Lengpui Airport panna kawng Sihhmui kaia Tlawng Lei dawh hna hi nikum lam atangin ngawrh taka thawh alo ni tawh a, nikum december thla khan load test a nih laiin a Lei khai kangtu cable pakhat a chah avangin lei dawhkai hna chu hun engemaw chen a khaihlak a, a helna kawngah LMV chin hnuai lam tan kal theiha siam niin Motor lian chu Buichali lama kal tura tih anlo ni tawh a ni.

Aizawl atanga Lengpui Airport panna kawng Sihhmui kaia Tlawng Lei dawh hi nikum October ni 30 atanga November ni 30 inkara zawh hman tura ruahman ni mahse nikum khan lei dawh kai an tumna lamah lei khai kangtu a chah avangin lei dawh hi hun engemaw chen a khaihlak rih a, kuminah Lei dawh kai tuma nasa taka hmalak thar niin vawiin khan Lei ruangam chu hlawhtling taka dawh a ni a, PWD chuan an thu ngaichang hrâm turin mipuite an ngen tih sawiin an harsatna chu hriatthiampui turin an duh tih an sawi bawk.

<><><>

RS MP

Rajya Sabha MP Pu K Vanlalvena chuan nimin khan Sairang Railway Station tlawhin, Hortoki thleng tunah rail a kal thei tawh a, Hortoki atanga Kawnpui thleng pawh commission theih tawh a ni a. Mualkhang thlengin zawhfel ani tawh tih a sawi.

Parliament session tân thla ni 3-a neih zawh taka tel Rajya Sabha MP Pu K. Vanlalvena chu nimin khân Lengpui Airport-ah lo tumin a haw kawngah Sairang Rel Station hi a tlawh nghal a, Deputy Chief Engineer Aizawl NF Railway Harjimal Meena-a'n a lo dawngsawng a, he hunah hian thusawiin MP chuan, Bairabi atanga Sairang inkâr km 51 leh tlêm hi hna zawh thlenga pawisa senso atâna santioned zât chu cheng vaibelchhe 8,215 a ni a, tân thlenga hman zawh tawh zat chu cheng vaibelchhe 7,714 a ni tawh a, hemi huang chhûngah hian zawh ngei beisei a ni tih a sawi.

Pu K. Vanlalvena chuan, Zin veivah nana tlâwm ber rail kawng Mizoramin a nei thei dawn ta chu lawmawm a tih thu sawiin, tunah hian helai hi rail kawng tâwp ber ni rih mah se, Mizoram dung hrûta Zochachhuah thlenga railway siam hi central sorkar thiltum a ni, a ti.

<><><>

SSA FREE TEXT BOOK

Samagra Siksha-in zirlaite tana zirlaibu a thlawna sem thin chu nimin zirna in hawn tanni khan zaa 85 a pe chhuak tawh.

Samagra thuneituten Akashvani Corr an hrilh danin, kumin pawl 1 atanga pawl 8 inkar zirlaibu chu nikum school enrollment atanga chhutin Printing and stationary dept atangin an dawng kim tawh a, zirlaibu zaa 85 chu District office ah an pe tawh a, district office te chu school hawn hmain pe chhuak vek turin an hriattir a ni. Hetihlai hian zirlai zingah sorkar school a inziak lut lehkhahu dawn hnua private school a insawn te an awm leh thin avangin Zirlaibu la pek chhuah hmabak zaa 15 chu kumin school enrollment tih chian hunah an pe chhuak chauh dawn a, tunkar chhunga tih chian hman an tum thu an sawi a ni.

Samagra in a chhinchhiah danin, nikum khan sorkar school leh SSA-ah zirlai naupang nuai 1 leh sang 1 vel an awm a, Early childhood care & education, ECCE, pre-primary ti a sawi bawkah zirlai naupang 8000 an awm baw a, pre-primary tana zirlaibu te hi zaa za an pe chhuak tawh thung a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PRESIDENT

President Droupadi Murmu leh Portuguese President Marcelo Rebelo de Sousa te chu nizan khan Lisbon ah an inkawm a. Inremna chi hrang hrang an ziak. Thuchhuah intawm an siamah President Murmu-i chuan India leh Portugal inkungkaihna chu chhinchhiahtlak atih thu sawiin tihchangtlun chhoh zel anih thu a sawi. President Murmu chuan sumdawnna, energy thianghlim, IT, start-up, innovation, thiamthil hman tangkai leh damdawi lama inremna an siam tih a sawi baw a ni.

President Droupadi Murmu hian nimin khan Portugal khawpui Lisbon hi a thleng a. Sawrkar chawimawina famkim nen ropui taka lo hmuah a ni. Portugal a tlawh zawh hian Slovakia a pan lehngal ang a. A cham chhungin Slovak President Peter Pellegrini leh Prime Minister Robert Fico te a kawm dawn a ni.

President Murmu-i hi kum 27 hnua India President zinga Portugal tlawh leh hmasa ber leh kum 29 hnua Slovakia tlawh leh hmasa ber tu a ni.



UNION HM

Unoin Home Minister Amit Shah-a chuan ramri vil turin khawl changkang electronic surveillance system hman anih thu a sawi. Nimina Kathua district-a BSF Border Outpost a tlawhnaah he thu hi sawiin Pu Shah-a chuan Jammu & Kashmir-a dankalha ramri kan ruk tumte lo manchhuak turin khawl thiamna tangkai takin hman a ni tih a sawi a.

Sipaite chu an hnathawhah lawmthu sawiin hun harsa tak karah pawh
tha taka an thawk thei chu ropui atih thu a sawi a ni.

